


Fasnacht 2023

R
u
e
c
h
e

I
n
f
o





Inhaltsverzeichnis

Vorwort	3
Aktivi Mitglieder	4
Apéro	5
Umzüge / Kontaktadrässe	7
Gedanke vom Obmaa zu 35 Joor Dorfplatzrueche	9
Rückblick 2022	13
Gönnerbitrag	14
Rückblick 2020	17
Klatsch & Tratsch	22





Vorwort

Liebi Gönner und Fründe vo de Dorfplatzrueche

im vergangene Joor het sich d'Situation uf dr Wält zum Glück wieder es bitz normalisiert.
Genau richtig zu eusere 35. Fasnacht! Das heisst, mir si wieder an allne 4 Umzüg drby und
chönn es wieder voll gniessen.

Bi de Aktive gits gueti News: Eus isch es glunge, en Ehemalige wieder zum Mitmache z'bewege
(nöchers drzue im Klatsch und Tratsch).
Die andere Chaote si immerno die gliche.....

An dr Fasnacht hämer e Premiere, so händ alli 3 Chind zum erschte Mol e Larve a.
Mega cool!
Zum Sujet säg i nit viel. Wer uns kennt weiss, dass s`35 drin vor chunnt.
Dr Apéro findet wie bereits Tradition am gliche Ort statt (d'Info drzu witerhinte im Buechli).

Mis Vorwort isch das Joor so kurz, will ich no Buechschtabe bruch zum dr spezielli 35 Joor Bricht
zschribe.
Aber es längt no zum allne e tolli Vorfasnacht z'wünsche.
Lueget uf Euch, bliebet gsund und mir werde uns ab em 26. Februar an dr Fasnacht 2023 gseh...

Im Name vo de Dorfplatzrueche

Dr Obmaa Thomi



Aktivi Mitglieder





Apèro am Fasnachtssunntig

Wenn:	Sunntig 26. Februar 2023
Wo:	Flint's Klientierpraxis, Hauptstrooss 19
Wer:	Alli Gönner, Fründe und die wo's no wärde wänd



Wiehnachtskarte 2022





Umzüge und Kontaktasdrässe

Umzüg wo d'Dorfplatzrueche teilnähme:

Sunntig, 26. Februar 2023	14.00 Uhr	Umzug Pratteln
Mäntig, 27. Februar 2023	14.00 Uhr	Umzug Frenkendorf
Zyschtig, 28. Februar 2023	14.00 Uhr	Umzug Pratteln (Kinderfasnacht)
Samschtig, 4. März 2023	15.00 Uhr	Schlussstraich Muttenz

Kontaktadrässe:
Thomas Meier
Muttengerstrasse 35
4133 Pratteln
metorage@gmail.com

Meldet doch beim nächsten Umzug Eure neue Adresse, damit unser "Heftli" Euch wieder findet.

Änderungen an die Kontaktperson melden





> Apéro, Raclette, Käsefondue oder Buurebrunch
Für Ihren Anlass mitten im Dorf auf unserem Hof

> Wir liefern Fruchtekörbe an Firmen

Diverse Früchte, je nach Saison
Für gesunde Mitarbeiter

> Hunde und Katzen Futter

Primafu Barf-Futter für Ihren Liebling
Bestellungen per Telefon oder Mail

> Weihnachtsbaumverkauf

ab dem 10. Dezember in der Hülften



Malerarbeiten daheim und am Bauplatz



Gedanke vom Obmaa zu 35 Joor

Dorfplatzrueche 1/3

Liebi Gönner und Fründe vo de Dorfplatzrueche

Ich ha mir erlaubt zu unsere 35. Fasnacht es paar Gedanke feschtzhalte.

Dr Ursprung vo dere Clique isch de Patrick Wachter und ich gsi, wo nach 3 Joor Fasnacht mitem Leiterwage gfunde händ, mir möchte en grosse Wage ha. Zämme mit es paar Kollege händ mir uns denn im 1988 gründet und im 1989 die 1. Fasnacht dörfe erlābe als “richtigi” Waggis.

Au dr Name händ mir schnell gha, da damals dr Schmittiplatz neu gestaltet worde isch, sind mir uf Dorfplatzrueche cho.

Ich darf sit am 1. Tag dere Clique als Obmaa diene und wird jedes Joor wieder gwählt (guet ich weiss nit genau warum? Isch es will ich mi Job so guet mach oder gäbe sie mir jedes Joor nomol d’Chance dä Misch vom Vorjoor z’verbessere?)

Ich möcht jetzt uf es paar Ereignis in unsere Gschicht aspreche.

Sicher ei Grund warum’s uns no git, isch d’Fusion im 1996 mit de damals fräsch gründete Knöpfli Waggis gsi. Da mir nur no 4 und sie au nume 5 gsi sind, händ mir uns zämmegschlosse, eifach unter unserem Name. Was denn natürlich zuenere markante Veränderig geführt het, mir si vonere reine Männerclique zuenere gmischte Clique worde.

E Entscheid wo mir bis hüt no nie bereut händ, au wenn zytewis s’wibliche Gschläch überhand gha het (und do redet me immer vo Frauequote).

Überhaupt isch unseri Clique oft wie e Bahnhof gsi, d’Lüt si cho und wieder gange, zum Teil au numme 1 Joor bliebe, will me’s mol het welle usprobiere. Denn hets Lüt geh wo Clique verloht händ, will sie sich nümme wohl gefühlt händ. Es git aber au Abgäng vo mir persönlich schwer gfalle sind, zum Beispiel dä Maa wo zu de Gaudi Clique gwächslet het oder die Frau wo zum FAKO isch. Aber ich darf mit Stolz säge, beidi sind hüt no Gönner vo uns und mir lache oft über die alte Zyte.

Überhaupt sind d’Dorfplatzrueche e Clique wo’s immer Veränderige gä het. So fahre mir zum Beispiel ufem 5. Wage sit unserer Gründig. Oder mir sind im Moment am 6. Wagebauplatz (an dere Stell es riese Danke allne Verantwortliche wo uns dä mega Bauplatz zur Verfüegig stelle, Danke!!!) und mir sind mittlerwile bim 5. Larveatelier glandet.

Au umzugstechnisch het’s immer wieder Veränderige geh. Sit Afang a sind mir natürli z’Pratteler drby, denn sind mir es paar Joor uf Fränkendorf und Füllinsdorf an Chinderumzug.

Nach es paar Joor sind mir statt uf Fränkendorf am Mäntig, 11 Joor uf Gälterchinde. Will mir jo e Prattler Clique sind, händ mir au gfunde mir unterstütze dr Prattler Chinderumzug. Und syt über 15 Joor sind mir am Schlussstrich in MuttENZ drby und mittlerwile au wieder z’Fränkendorf statt in Gälti. Aber ich darf säge, in de letschte Joore sind mir in allne Belange konstant blibe, was mich persönlich mega freut.



Gedanke vom Obmaa zu 35 Joor Dorfplatzrueche 2/3

Natürlich sind in unserer Clique au Sache schief gloffe.

So händ mir eimol müesse unsere Traktor überbrücke zum uf Füllinsdorf chönne fahre. Und wie's so isch, isch er natürlich in Füllinsdorf am Chinderumzug wieder nit agsprunge und mir händ en chleinere Stau verursacht.

In eim Joor het sogar dr Traktorhändler müesse cho, go e neu Batterie ibaue will nüt meh gange isch.

Überhaupt isch das Thema Traktor e Fall für sich bi uns. Mir sind scho 2 mol vor dr Fasnacht ohni Traktor do gstande. Eimol 4 Wuche vorher und mir händ eine chönne uftriebe und s'leschtmol 2 Wuche vor dr Fasnacht wo uns de Händler gseit het, er hegi das Joor keine für uns... und das nach einige Joor miete bi ihm. Zum Glück händ mir durch e gueti Fee denn au wieder en Traktor chönne bsorge. Und ich darf mit Stolz und Glück säge, mir dörfe dä immer no benütze (es riese Danke an dere Stell)

Wer mi kennt, cha sich vorstelle, dass ich au usem Näichäschtli plaudere und es paar lustigi Anekdote verzähl, wo in de leschte 35 Joor passiert sind (us Diskretionsgründ wärde natürlich keini Name gnennt)

Do händ mir mol dä Maa wo am Sunntigmorge verzweiflet sini Larve ufem Wage gsuecht het und e Kolleg het ihm denn gseit, er soll emol daheim luege und voilà dort isch sie gsi, imene Abfallsack bereit zum an d'Strooss zstelle.

Denn gits die Frau wo nachem Perücke uf d'Larve liime, nit het chönne warte und Larve alegt, mitem Ergebnis, dr nonig trochneni Heissliim het au ihri Hoor and Larve kläbt.

Eim Aktive isch mol dr alti Feldschlössli Wage mitem Gwicht vo ca 3.5 Tonne über dr Fuess gfahre, zum Glück het er Zoggeli agha. Ok, er het sie denn nümme chönne abzieh will dr Fuess so gross worde isch. Er het's aber mit Humor gno und gmeint: "Jetzt weiss ich als einzige wie sich dr Wage afühlt."

Mir händ mol es Larveatelier gha, wo mir dr Innehelm jedes Joor abgschrubbt händ und in neue Helm inegmacht händ. Ei Aktivi het das nit tscheggt und sich nachem Umzug beklagt ihri Larve het nit ghebt, sie häg sie immer mit einere Hand müesse hebe.

Mir händ mol 2 gha, die händ joorelang alles gstriche, am Änd vom Wagenbau isch denn eine immer go luege ob's no irgendwo Abdeckband het und wehe wenn ja. Irgendwann händ sich die 2 denn jedes Joor dr Spass erlaubt und immer irgendwo extra Abdeckband dra z'lo zum Luege ob er's findet. Falls ihr also an unserem Wage so öpis gsehd, denn wüset ihr jetzt wiso.

Genial isch au gsi, wo mir usem Wage es Chalet baut händ und mir Aktive usse dra ufem Balkon gstande sind, kurz vorem Umzug händ mir gemerkt, dass mir durch die 4 Fenschter gar nit ans Wurfmaterial ane chömme. Schnell händ mir 2 Kollege uftriebe wo uns denn immer im Wageinnere s'Material ans Fenschter geschobe händ. Aber ' Beschte am ganze, beidi si im Joor druf bi uns ufem Wage gsi.

Plakette 22/23



Gedanke vom Obmaa zu 35 Joor

Dorfplatzrueche 3/3

Au genial isch gsi womer es Türmli ufem Wage baut händ. Vom Tramstübli sind mir denn in Zehntestrooss ine gfahre zum Istoh uf dr Route, aber ohä mir sind wäge dä parkierte Autos stecke blibe. Also retour und via Schlossstrooss ins Dorf. Hmm s'nächschte Problem, mir si z'höch mitem Türmli für Tramgleis, also Türmli abbaue und witer. Churz vor de zwei sind mir an unserem Istohplatz acho und zum Glück het dr Prattler Umzug zu dere Zyt nie pünktlich agfange und mir händ no Zyt gha s'Türmli wieder ufzbaue.

So zum Schluss möcht ich no Danke säge. Zerscht mol euch Gönner und Fründe, dank euch isch für uns d'Fasnacht überhaupt finanziell machbar.

Denn es Danke allne Aktive wo irgendwann in dene 35 Joor e Teil vo uns gsi sind.

Au es Danke mine momentane Mitfasnachtler/inne (muess jo gendergerecht si).

Ich hoff no viel tolli Moment mit euch dörfe z'erläbe.

Es ganz speziells Danke unserem Chauffeur Adrian, wo mich syt 35 Joor uf mim Weg begleitet und uns Joor für Joor sicher durch d'Fasnacht fahrt, au wenn er ab und zue öpis vergisst. (meh drzue im Klatsch und Tratsch)

Jetzt freu mi mega und wünsch allne e tolli Fasnacht und uf die nächschte 35 Joor.

Euer Thomi



Rückblick 2022 1/2

Sujet: Weisch no...??? 2.0

Euses Sujet das isch alt
 wieso das wüset ihr scho bald
 vor genau zwei Joor im 2020
 macht eus dr Bundesrot ganz ranzig
 seit zwei Tag vor dr Fasnacht alles ab
 isch planmässig scho bitzli knapp
 au dr Ichauf vo de Orange isch in d'Hose
 und zuedem hocke mir uf 800 Rose
 drum händ mir dr Wage gar nümme fertig baut
 jähä Herr Berset hesch eus d'Fasnacht versaut
 und euses Sujet müent mir storniere
 naja werde mir's halt im nöchschte Joor probiere.

Aber oha Lätz s'isch nüt drus worde
 wieder tuet s'Corona überborde
 s'Beschte mir chönnte dr Bundersrot küsse
 sie tüends bereits im Oktober scho wüsse
 das heisst, sie händ in Bern e Moment gstudiert
 und ändlich mol öbis verstande und kapiert
 für eus heisst's am Fasnachtstuech nage
 und s'Sujet erneut uf s'nöchschte Joor vertage.

W
a
g
e
n
2
0
2
0
/
2
0
2
2





Gönnerbitrag

Dorfplatzrueche Pratteln

IBAN CH68 0900 0000 4021 7101 0

Und wieder landisch uf dr Gönnerbitrag-Site
die git`s all Joor, das isch unbestritte
denn es weiss jedes Kind, dr Hund und au s'Schätzeli
Fasnacht mache, choschtet e chli Bätzeli
klar zahle mir Aktive öpis y
und au vom Wiehnachtsmärt chunnt öpis dry
das längt leider nit, dass isch eso
drum si mir um euch Gönner froh
den jede zahlt was er will
kei Franke isch zwenig oder zviel
Aber vor einere Sach chönne mir euch leider nit schütze
ihr müend jetzt der neu QR Code benütze
stosch technisch vorere unbezwingbare Wand
drucksch dr Bitrag eifach imene Aktive in d'Hand
mir möchte uns jetzt scho e Mol bedanke
über jede überwieseni Gönnerfranke.



Stefan Häring

Geschäftsführer
Mobile: +41 79 671 37 70
haering@thommenmaler.ch

thommen maler ag | Ramllinsburgerstrasse 1 | 4415 Lausen
Telefon +41 61 901 20 40 | Fax +41 61 901 20 45
info@thommenmaler.ch | www.thommenmaler.ch

Bitte berücksichtigen Sie unsere Inserenten, denn Sie berücksichtigen auch uns.



Izahlungsschin Gönnerbitrag

Dorfplatzrueche Pratteln

IBAN CH68 0900 0000 4021 7101 0

Empfangsschein Konto / Zahlbar an CH68 0900 0000 4021 7101 0 Dorfplatzrueche Pratteln 4133 Pratteln Zahlbar durch (Name/Adresse) Währung Betrag CHF Annahmestelle	Zahlteil  Währung Betrag CHF	Konto / Zahlbar an CH68 0900 0000 4021 7101 0 Dorfplatzrueche Pratteln 4133 Pratteln Zusätzliche Informationen Gönnerbeitrag 2023 Zahlbar durch (Name/Adresse)
--	---	--



Rückblick 2022 2/2

Den ändlich isch 2022 do
aber keine weiss was wird go
baue mir de Wage oder nit?
Die Ungwüssheit isch doch e Shit
soll me plane und sich freue
mitem Risiko es wieder z'bereue
oder wänd mir eifach nochli warte
irgendwann zeigt dr Bundesrot die offene Charte
den am 17.Februar euses Lache wird breit
d'Zertifikatspflicht isch Vergangeheit
so händ mir bitz Stress s'liegt uf dr Hand
zum Glück isch's Sujet scho bekannt

Es isch wie im 2020 genauso cool
mir meine eifach: Weisch no...??? 2.0
frogsch die jetzt was mir mit dem Sujet meine
do händ mir e Tip ganz e chleine
dreih dr Wagezettel uf die anderi Site
und scho ghörsch geistig zu de Fite
den dört händ mir dr Zettel vom 2020 druggt
chasch alles läse, isch das nit veruggt?

Jetzt gniesse mir d'Fasnacht das isch kei Lug
schliesslich händ mir alli extrem Entzug
Gniessets, blibet gsund... euri Dorfplatzrueche
ahjä nöchsch Joor müesse mir e neus Sujet sueche!!!

Jetzt chasch wyterläse 1.0 →



Rückblick 2020 1/4

Sujet: Weisch no...??? 1.0

Wer kenn's nit s`Rad vo dr Zyt lauft
wirsch pensioniert drby bisch erscht tauft
hüt modern und morn scho alt
so schnell lauft Zyt so isch es halt
au mir bruche bald e Rollator oder Gehstock
früener hämer Purzelbäum gschlage in Woodstock
mache drum jetzt Fasnacht, nei nit als Pippis
sondern als usgflippti, bunti Hippies
und händ e Reis in d`Vergangeheit unternoh
luege zrug und froge: Weisch no...???

Willsch hüt Milch, muesch in d`Migros go
früener isch dr Milchmaa no heime cho
mit sim wiss/blaue Charre
isch er in Prattele umegfahre
vo Huus zu Huus das isch dr Hit
bringt er die feine Sache mit

Firestone, Bombardier oder Persil
es gäbt au no anderi Bispiel
die si alli nümm vorhande
sogar e Landi isch mol z`Prattele gstande



Rückblick 2020 2/4



Au sportliche Aläss si verschwunde
s` Grümpeli isch in dr Sandgruebe unte
uf dr Hexmatt sind's no richtigi Parties gsi
aber ebe das isch jetzt au verby
oder d`Velofahrer mit ihrem Grossalass
mir finde das hüt no krass
mitte in Prattelen isch gsi dr Start
genau mir meine d`Warteberggrundfahrt

Mir händ au anderi Aläss gfunde
wo's leider nümme git, sie sind verschwunde
dört wo's hüt leider nümme goht
vom Nomidaag a bis Zobe spot
het's im Geisswald viele Gäschte
isch jo klar s`isch Waldfeschte

Wenn het me dr neuschte Suuser chönne probiere?
Jo jetzt muesch nit lang studiere
dr Maa het Durscht und d`Frau isch e Wildi
hejo den isch Zyt für d'Suuserchilbi

Dr Finger innestecke, ummedreie bis es quält
so hesch früener Nummere gwählt
mitem Telefon ummelaufe isch nit gange
die sind an dr Wand ghange
bisch modern gsi, bisch besser dra
hesch öbe 5 Meter Kabel gha
bi dr Kabine isch ohni Münz nüt gloffe
usser am Barfi dört hesch di zum Date troffe

Vorbereitige für e Wiehnmachtsmärt 2022





Rückblick 2020 3/4

Mit de Fernseh isch es die gliche Sach
die si nüm dick und schwer, sondern flach
Fotiapparat sind schlecht usgstatte
Musik hämer gloost ab dr Langspielplatte
für unterwegs dr leschti Schrei
git's Walkman, hüt sind's MP 3
Game Boy hämer gspielt bis zur Hypnose
ab em Kasettli hämer dörfe Kasperli loose
Play Station hämer au nit kennt
das hämer no „Eile mit Weile“ gnennt

Mir luege au zu de Schlecksache ganz fix
Raider heisst hüt Twix
was au hüt nüm chasch ha
sind Zuckerperlechetti oder Bazooka
au dr rundi 5er Mocke
tuet hüt als 20er verlocke
was es aber immer no git ohni Ghetz
sind Brausepulver Double Dip, Tiki oder PEZ
Schleckmuschle, Cola Fröschli oder Carambar Caramel
die findisch au no am Kiosk im Gstell

Bim nächschte Vårs han ich viel glitte
ha nämlich mit dr Greta gstritte
sie meint dr Klimaschutz muess au vorcho
drum han i halt dr Winter gno
Schneeballschlacht, Schlittle hämer dörfe erläbe
dr einzig Schneemaa hüt isch a dr Fasnacht und dä dörf witerläbe

Rückblick 2020 4/4

Au an dr Fasnacht mir sind betroffe
 isch früener es bitzeli meh gloffe
 immer am Zischtig so genial
 hämer gha dr Chluriball
 den jede Tag offe dr grossi Star
 jo mir meine d`Chueli Bar
 was wieder chunnt das tuet uns gfalle
 no meh Fasnacht in dr Dorfturnhalle

Jetzt isch fertig mit dr Vergangeheit, Digge
 mir möchte wieder in d`Zuekunft blicke
 au im 2021 wämer e Teil si vom Fasnachtschueche
 doch ei Wunsch hätte d`Dorfplatzrueche
 er handelt vo dr Blagettevernissage
 bitte nit nomol so e Blamage
 drum schriebe mir das in dem Värs
 gnueg Bier am Apéro, jo das wärs.



- Augst
- Basel
- Muttenez

www.gauglerbrot.ch 061 811 10 08



Klatsch & Tratsch 1/4

S'Wätter am Fasnachtsmäntig 2022 isch gsi dr Hit
 leider chunnt nur s'halbe Wurfmaterial mit
 D'Clique stoht zum Wagelade bim Bielserhof bereit
 es isch Elfi...zäh ab... viertel ab...aber kei Adi wit und breit.
 Dr Thomi lütet am Adi a und frogt:
 "Adi, wo blibsch mitem Wage oder het di no öpis plogt?"
 "Aha... i bi scho z'Fränkedorf, dass han i vergässe."
 "Ha dänkt, i will vorem Umzug no öpis go ässe."
 Also s'Material bim Ron ins Auto inebiege
 und hoffe, dass nüt blibt liege.

Sit Joore hilft dr Megge am Wagenbau
 fröhner sogar als Aktive ganz genau
 Mir möchte scho lang das er zu uns zrugg chunnt
 aber er findet immer en andere Grund
 In Mutterz het sich alles für uns glänkt
 er het schnäller gschnurrt als dänkt
 und seit mit eim Satz:
 "Für mich bruchet ihr ufem Wage ei Platz."
 Und er wett si eigene "Räpplisagg" ha."
 Chuum gseit isch dr Thomi scho dra
 und organisiert isch dä nit schlau
 e "Räpplisagg" in blau
 Nach 10 Minute zeigt er es Bild voll Wonne
 seit zum Megge: "Herzlich Willkommen"



Für an Wageabbau fahrt de Thomi los
 irgendwie rumplets uf de Strooss
 nachem Adi uflade fahrt er wyter
 jetzt tönts uf dr Stroos aber no schitter
 nachmem Werkzeug uflade tuet er telefoniere
 und de andere säge; "Müend nit pressiere
 denn ich bi jo so en glatte
 ha hinte links kei Luft, also e Platte."



Klatsch & Tratsch 2/4

Tizi tuet immer eusi Zoggeli sprütze oder mole
für das muess si immer Farb go hole
hintedri seit dr Luca er will au Zoggeli ha
also muess sie leider nomol dra
das alles glänzt chunnt Klarlack druf
denn wird aber s`Tizi muff
sie het anschinend so hämer verno
statt dr Klarlack die schwarzi Farb gno.

Syt Joore gönd mir Dorfplatzrueche
Ändi Januar s`Larifari go bsueche
das Joor das dörfe mir euch verzelle
het me Billet zum Erschtemol chönne online bschtelle
dr Thomi het das den überno
und im Dezämber händ in fast d`Närve verloh
x mol probiert aber nüt isch gange
er foht scho langsam a um d`Billet bange
den seit sini Frau: "Blib nümm z`lang dra,
dr Vorverchauf foht erscht morn a."

Zum Larifari fällt unss no öpis i
4 sind gange spöter sind mir 5 gsi
dr Wyy isch gflosse und das nit wenig
doch für's Petra immer no zwenig
stürmt stundenlang : "Ich will in d'Bar!"
Öbe am 2 am Morge hämers gschafft isch jo klar
doch unseri Petra wird halt alt
mag nümm trinke so isch es halt
het ihri Drinks das muess me lobe
schön brav dr Tiziana übere gschobe
sie trinkt die leer ohni grossi Gedanke
d`Quittig chunnt denn bim Heime schwanke

Ehrentag

Geburtstag

Jubeltag

d o r f p l a t z r u e c h e - p r a t t e l e . c h



SolBus AG

Zurlindenstr. 13, 4133 Pratteln
info@solbus.ch www.solbus.ch
+41 61 823 22 44



Gediegene Busreisen mit dem Culinaria Magnifica II

Ungestresstes Reisen in einem Bus, dessen Ausstattung keine Wünsche offen lässt – dies bietet das kleine Reiseunternehmen SolBus AG in Pratteln. Die Angebotspalette reicht dabei von Tagesfahrten in der Schweiz, Kurztrips in angrenzenden Ländern, bis hin zu ausgedehnten Rundreisen etwa nach Norwegen, in den Süden Englands oder Sizilien.

Details finden sich im neuen Katalog oder online.



Klatsch & Tratsch 3/4

Letscht Joor nachem Umzug am Apéro
het dr Thomi d`Luscht verloht
denn er het, dä armi Maa
am Umzug sini Goldplakette verlore gha
er cha an dr Fasnacht nit nur ummegammle
nei er tuet au Plakette sammle
zum Glück het dr Adi das isch kei Scherz
Mitleid und es grosses Härz
und seit zum Thomi: "Ich tue an dich danke
und dir nach dr Fasnacht mini schänke."
Doch es goht es zytli dr Winter isch scho nah
denn dr Adi het Plakette dehei au verlore gha.

Unseri Cliquemänner und Koschtüm das isch es Värslä wärt
denn es het sich in de leschte Joore bewährt
d`Fraue luege bim Brunch alli genau a
isch bi jedem au alles drby und au alles dra
oder het ein d`Hose verchert azoge
bi 2 farbige Socke d`Site verwächlset das isch nit gloge
das Joor wird den bsunders geil
den 1 Kostüm besteht us 5 Teil
drum müesse sich 2 bim Tizi dehei alege
nei nei das macht die beide gar nit verläge
mir nenne natürlich au keini Name
und wüsstet nit genau sis Männer oder doch Dame?

Am 2. Wagenbau isch es chalt wie e Moore
d`Farb isch uf dr Rolle gfrore
nüt mit mole das chasch vergässe
me händ alli Platte vermässe
denn alles iglade imene Charre
und s`ganze Holz zum Tizi gfahre
dört wird das Holz den molerisch behandelt
und Tizi het eimol me d`Stube in es Moleratelier verwandelt
jetzt chönne die beide Fraue in dr Wärmi mole
und Männer sich im Schopf e Verchältig hole
doch ei Vorteil het das Ganze
me trifft sich dört zum Büechli schribe und Button stanze
und mir wäre nit Dorfplatzrueche
gubtis nit au no Kaffi und Chueche.

Klatsch & Tratsch 4/4

Bi de Dorfplatzrueche mache Chinder mit
 das isch nochwuchsmässig scho en Hit
 aber die grösschte Chinder sind die alte
 das müesse mir nit für uns bhalte
 hocke alli ziemlich schnäll
 eifach so uf's Chinderkarussell
 s'Ziel vo dere Üebig muesch nit lang warte
 das git s'Foti für d'Wiehnachtscharte.

Im Rueche - Info händ mir au immer Inserat
 die macht dr Adi immer parat
 er frogt immer si alli no aktuell
 meldet d'Änderige aber schnäll
 und meint: "Vom Ron sötti au no Bscheid becho."
 Drby isch das Mail scho sitere Wuche cho

Euses Kreativ -Team isch dr Wahn
 merke bim Umsetze es isch sehr filigran
 bruche drum au sehr viel Geduld
 zum Glück isch es ihri eigeni Schuld
 aber s'Ergäbnis loht sich gseh
 drum juble sie au : "Juheeee"
 Numme Ein muess leider e Nachtschicht illegge
 es isch unsere armi Vorlage -Usschnitt- Megge





Mittagessen beim Wagenbau

RESTAURANT GEHRENACKER



**Fam. W. Wyss, Oberfeldstrasse 21
4133 PRATTELN Tel. 061/821 52 52**

**Treffpunkt für Jung und Alt
Große Glace Auswahl
schöner Garten & grosser Parkplatz**

Auf ihren Besuch freut sich Fam.W.&J. Wyss
Tel. 061/ 821 52 52
Dienstag Samstag 08.30 - 23.30
Sonntag 9.30-16.00 Uhr, Montag geschlossen



Bürgergemeinde Giebenach



Oberholzstübli

„Ihr Raum für jeden Anlass...“

in Giebenach

Auskünfte und Reservationen

Christian Venturini
079 889 57 00
ohs@bg-giebenach.ch